

Դուրս եկաւ մի վայելչահասակ կին, թուխ դեմքով, սեւորակ, կրակոտ աչքերով, խոհանոցի դէնջակը գոզնոցի տեղ կապած: Այդ նազելի կինը, թէեւ վաղուց անցուցել էր երիտասարդական տարիները, բայց դեռեւս չէր կարելի առանց հիացմունքի նայել նրա վրայ: Նա ներկայացնում էր գեղեցկութիւնը իր հասունութեան մէջ: Նա մի ժամանակ Դինբուլիների ամրոցի զարդն էր, յափշտակուած Աւղանիստանի անապատներից: Իսկ այսօր մի շինական խաղաղ տան ժրաջան տանտիկինն էր:

Դա պառաւի աղջիկն էր, Կարօյի կինը եւ Զիւբբիի մայրը՝ գեղեցիկ Ասլին:

Տեսնելով պառաւին, սեմի մօտ նստած, կարեկցաբար դիմեց նրան.

– Մայրիկ, դու դեռ երեկ գանգատում էիր ոսկրացաւից, այժմ դարձեալ նստել ես այդ սառն քարի վրայ:

– Իմ ոսկորները սառի եւ քարի վրայ են պնդացել, զաւակս, – պատասխանեց պառաւը եւ չշարժոցաւ իր նստած տեղից:

Ասլին չհակառակեց նրա յամառութեանը, ներս մտաւ եւ իսկոյն դուրս բերեց մի փոքրիկ օթոց, խնդրեց նստել նրա վրայ, որը դժոարութեամբ ընդունեց պառաւը:

Ասլին անցաւ պարտեզը, ուր աշխատում էր նրա ամուսինը: Անցաւ վարդենիների եւ յասմիկի ծառուղիների միջով: Կշտից քարշ ընկած մկրատը տարաւ դէպի մի խոշոր սպիտակ վարդ, կտրեց եւ խրեց կուրծքի վրայ: Յետոյ քաղեց երկրորդը, երրորդը... զանազան գոյներով, եւ ճաշի սեղանի համար մի գեղեցիկ փունջ պատրաստեց:

– Մայրի՛կ, – ձայն տոնեց հեռոցից փոքրիկ Աշխէնը:

Մայրը մօտեցաւ:

– Տե՛ս, այդ մէկը ես կապեցի: – Նա ցոյց տոնեց իր կապած պատռաստի ճիւղը: – Տասն տարուց յետոյ կարմիր խնձոր կը տայ:

Մայրը գրկեց աղջկան եւ համբուրեց, յետոյ դարձաւ դէպի ամուսինը, հարցնելով.

– Այլեւս ովքե՞ր կը լինեն ճաշին:

– Մերոնք, – պատասխանեց այրը, մերթ նայելով կնոջ վրայ եւ մերթ նրա փնջած ծաղիկների վրայ, կարծես կամենալով ստուգել, թէ դրանցից որն աւելի անուշահոտ է:

– Դու ասեցիր, որ ուրիշ հիւրեր եւս կլինին: